

## **Kálag echě Paalε áténlé Baá Kolose Ndibned n kálag**

Paalε, mbapεε a nlomag nhóg awe Yesu Krístəə mós antěl enén kálag áde ádíí á mbwəg á dyad á Roma. Antelé bad bé dyad á Kolose. Saké Paalε andibé mwembé míme mbédé á Kolose. Epafrase mós andibé mwembé míme mbédé áwed. Epafrase ambé á dyad á Efesus. Anwóg eyale é Dyöb áwed, adúbe-’ε Yesu Krístəə. Anhidnéd échē eyale, áke ákal chó á Kolose, ádíbe-’ε mwembé áwed. Ambíd e pónde, Paalε anwóg nén bán bemeléde bé metóm bépééné ayáge áde déeboo á mwembé-te wē. Abē bemeléde béyágté’áá nén bán, kénzée awē ahede’ Dyöb abii, awē ahede-’ε e’soosə akud, atəngéné née ábageé ngíne ne benkamlε bé nkönsé edúbé. Bán mod atəngéné-’ε née áhídeé mbéndé née áyag mod ne áhíd mbéndé émpē təngene ndyééd échē mod éētəngeneé adyé, ne ekud é mam émpē. Mmén mekan mésyāī-lóó mós mēnkəŋ boŋ Paalε áténlé bad bé mwembé mé Kolose enén kálag, áleb bó ábel bébii mbále təngene Yesu Krístəə ákamlε bad bésyāī ne ákamlε ngíne é nköŋ rísé ne mímin. Mwēnpēnaá ahele ahúd syánē á mbéb-te.

### **Nkabtéd n kálag**

Ndibned n kálag 1.1-8

Nsón míme Krístəə 1.9-2.19

Alongé dékōlē ábe ne Krístəə 2.20-4.6

Nsógten 4.7-18

*Paale alómmé bad melentɛn*

<sup>1</sup> Mɛ Paale, mbapeɛ a nlomag nhóg áwě Yesu Krístəə, ngáne Dyöb áttíde mɛ-ɛɛ ntenlé nyé enén kálag. Se Timoti, awesyánē mwānyan a Krísto, sêlómme nyé melentɛn.

<sup>2</sup> Ntenle nyé bad bé Dyöb ábe nyêdé á dyad á Kolose. Nyêdé ne Krístəə, nyêhíde-’ɛ mó ne nlém nhóg. Nsimé ne nsan ní Dyöb Titéɛ awêd mbé ne nyé.

*Paale aságnéné Dyöb á mekáne-té*

<sup>3</sup> Póndé téé sêkännad nyé, sésāgnān Dyöb, Sáá awě awɛd Sāngwéé, Yesu Krístəə.

<sup>4</sup> Sésāgnan Dyöb áyāle sêwógé bán nyêdúbpé Yesu Krístəə, nyêdāó-’ɛ bad bé Dyöb bésyāal.

<sup>5</sup> Sêbíí nén bán nyêbele’ nê áyāle nyêsumé nlém nén bán nyêkúð nnam nímé Dyöb ákóñnéde nyé ámīn. Nyém̄mad mam awóg t̄ñgene nímê nnam ádê bésébpé nyé nkalan ní bwām ní mbále akale.

<sup>6</sup> Mmén nkalan ní bwām mé nsimé ní Dyöb níkanlad mebwóg ne mebwóg níkag á’sō. Epun e é’só éche nyéwógé nyênsóñtén bán Dyöb ákóñté nlém ní bwām awóñ ne bad bé mbéb.

<sup>7</sup> Epafraɛ, mbəledɛ awe Yesu Krístəə móo ankalé nyé nímê nkalan. Adíí mod awě syāābōo sêbele’ nsón, sêdāó-’ɛ mó bwāmbwam. Abenle’ Yesu Krístəə ne nlém nhóg. Abé áde ádíí-’ɛ ne nyé, nsón nímé séntāñgēnnē abel móo ábelɛé.

<sup>8</sup> Mó alánge-’ɛ sé aá Edəədəñ é Dyöb ébélé nyêdāó bad bé Dyöb.

<sup>9</sup> Né-óó, bootya póndé echê séwógé nímén mam, sêkännad nyé póndé téé. Sêkānne nén bán Dyöb ábel nyékon chōm éche áhɛdɛé aá nyébel asóñten.

Sêkânne nén bán Dyöb áβε nyé debyéé ne nsôñten ábel nyésôñten mam mé Edáádəñ bwâm.

<sup>10</sup> Nê débēl ádēn alongé débē ngáne alongé áde bad bé Dyöb átəñgéné abé. Nyéēbēle' mam nímē méwógte mó menyinje. Mekan mé bwâm mó ne mós-éé nyébeléé. Nyaa echē nyésōñtēn-naá Dyöb, échāgkē acháge ne acháge.

<sup>11</sup> Sêkânne-ε ámpē nén bán, Dyöb ábē áwēd nyé áte ne echē ngum echē echabé ámín, ábel nén nyéhēl awēsēn, nyékanə nlém, nyébé-ε menyinje áyāl e mam mésyāāl.

<sup>12</sup> Nyéēsāgnēn Titéε áyāle chōm ésyāāl. Mós-áá abelé bon nyékwognéd ábē bad ábe békobe akab á bwēm ábe ákōñnéde ábē bad hōm áde e'nyíñen bé ekíde é'díí.

<sup>13</sup> Ahúde syánē ásē e ngíne e nkamlεε a ehíntén, apééne syánē ásē e nkamlen míme awe Mwän a nlém.

<sup>14</sup> Dyöb álágséné syánē nímēd mbéb akode áde ákódté syánē ne mekií míme awe Mwän ásyóge á awog.

<sup>15</sup> Modmod eenyínnéé Dyöb díđ. Bon bad bénsōñtēn ngáne Dyöb ádíí áde bényíne Krístə áyāle adíi nwágén ní Dyöb.

<sup>16</sup> Edé nê áyāle, mbwiined ne Krístə dōo Dyöb áhágé bwēm é'syāāl á nkon mí mín ne ísé. Ahágé bwēm ábē bényínnéé díđ ne ábē béenyínnéé díđ. Mó ahágé benkamlεε, ne ngíne ésyāāl. Dyöb áhágé bwēm é'syāāl mbwiined ne mós, mós-áá Dyöb áhágkē ábē bwēm é'syāāl.

<sup>17</sup> Bédēhób bán béhəge' kéchéé á nkōñsé-te né Krístə adé alongé. Mós-áá akəá bon bwēm é'syāāl ébē á e'dii.

18 Mós adé nló míme bad ábe bédúbpé mós, bós-'aá bédé nêngáne eche yǎl. Mós abage ábê bad alonjé áyāle mós adé mod a'só awě Dyōb ápuúdté awě ábē-ε abé ne abé. Nén dēmbēnléd ábēl nén ábē nkamlεε ámīn mekan mésyāāl.

19 Mmén mekan médé nê áyāle nén Dyōb dēn-εé ádē.

20 Dyōb dēmbēl nén aá chōm ésyāāl étim ásē ne mós Dyōb mbwiined ne Krīstā. Abén bwēm é'bédé bwēm bé nkoj ísé ne bwēm bé nkoj mí mín áyāle asyog ádē awe Mwān ásyógé mekií á awog. Bōb-pōs, chōm ésyāāl éhele ébē nsaη ne Dyōb.

21 Nyé ne nyé nyēmbé nchabned ne Dyōb, nyāābe Dyōb nyéebédeé áyāle mewēmtεn mé mbéb míme nyénwōη'έ ne mbēltéd mé mbéb míme nyébélé'aá.

22 Boη bōb, Dyōb ábélé nyētimé ásē ne mós, awé áde awe Mwān Krīstā awě abédé moonyon áwédé á awog. Dyōb dēmbēl nê ábēl nén nyébê wéε módíí, nyébê bad ábe bésáá, nyéewóó atón dé mbéb ké ahóg á yǎl, béēkōbnē-ε nyé awusé ké ahóg.

23 Ebê nén bán áden adúbe adíi awúú áte nyéehúde-ε mekuu ásē ne asum áde nyésumé nlém áyāl e nkalaη mí bwām míme nyéwógé. Mmē nkalaη mí bwām míme nyémáá awóg, rídíi nkalaη míme ríkánlédé nkōηsé áte rīsyāāl mós-'aá με Paale, rítimé mbaledε a Dyōb ákal.

### *Nsón míme Paale*

24 Ndé menyinje bōb ne metake míme ríkudεé áyāl echēn. Ngáne ríkudεé mímén metake, mmade metake míme Yesue mímě rítāηgéné abé, áyāl eche yǎl, nédē bad ábe bédúbpé mós.

25 Dyõb ábélé me mbaledε ábele bad ábe bédúbpé Krístæ. Alómé me aá ríkoŋ nyé éché eyale akale bwâm.

26 Bòd, éché eyale émbē dyam ádē bad bénkēnsóŋtēnné. Boŋ bōb abele ábē bad bēbíí ch́.

27 Dyõb áhede' nén aá ábē bad bēbíí nén bán nhon ne ehúmé éche Krístæ édé káŋne ne bad ábe béesě bad bé Israel. Kun eché edé áwēd-te edii nén bán, nyésum nlém nén bán nyékūd ehúmé éche Dyõb áhóbé aá móbē ábē bad.

28 Né-'aá ákóó boŋ sélāngē bad t̄ŋgene Krístæ kéhéé wεε sékagké. Sélébe', séyāgtē-'ε bó ne debyéé ásyāāl áde Dyõb ábágé sé. Sēbele nē áyāle sēhede nén bán békobned á'sō é' Dyõb nēŋgáne bad ábe mekuu mémáá awédned ásē á adúbe-tē.

29 Boŋ nwane áte bwāmbwam. Ngum eché Krístæ eche edé me áte, ch́-'ε ebage me ngíne áwan áte.

## 2

1 Ndáó méé nyébii ngáne ríkempéé awan áte áyāl echên, ne áyāl e bad bé dyad á Laudesia, nyébii-'ε ngáne ríkempéé awan áte áyāl e bad bémpee ábe béenyinnē me díd.

2 Mbele nē áwéd bó nlém á abum ábel boŋ edaŋge éche édé áfintē echên ébel nyébē mod nhóg. Nhede me nyāābō nyésum nlém ne asum ásyāāl néε bad ábe bésóŋténé dyam á Dyõb áde bad bénkēnsóŋtēnné. Adé dyam-me ádii Krístæ mwēn.

3 Krístæ móō ahele ábēl boŋ nyēwóŋ debyéé ásoŋten mekan mé Dyõb. Mmē mekan médé etógnén bwāmbwam.

4 Nlânge nyé nén âbel bonj mod eédogné nyé e'nyin bé nsal áte se nyêwémtén nén bán dýam áde álângeé nyé átângeéné.

5 Ndəá mée nyébii nén bán kénéε mmən méesaá ne nyé, ndé ne nyé é edəádəŋ. Kénéε méesaá-'aá ne nyé, ndé menyiŋge nén adúbe áde nyédúbpé Krístəá ályáge áde ngíne.

*Bad bé Krísto béesaá dsē  
e mbéndé é nkōŋsé ámpē*

6 Né-ɔ́, ngáne nyékóbé Krístəá née Sánḡwéé awêŋ, nyébê nyébele' ngáne áhedéé.

7 Adúbe áde nyédúbpé chōm-éε ábēŋ bemeléede béyágté nyé édé mbále. Nyéságnan-ne Dyōb pónde té áyāle chōm ésyāāl.

8 Nyéēmwāg-se mod atéd nyé ntāŋ áhíd e'hóhó bé áyáge dé metóm áde béyágtéé. Ayáge áde béyágtéé nyé ádíi ayáge áde békóbé wéε ábāb be-taa ne áde áhíde mbéndé é mekan mé nkōŋsé. Adé ayáge ádíi ayáge áde áhúú ne baányonŋ ngēŋ déēhúú'é ne Krístəá.

9 Nyéēmwāg-se ábê bemeléede bé metóm bédog nyé áyāle nén ngíne ne abé á Dyōb áde yāl e moonyonŋ echē Krístəá áte.

10 Né-ɔ́, nyélóné mbon áyāle nén nyédé ne Krístəá, Mó-'aá akamlan ngíne ne benkamlεε bésyāāl.

11 Abé áde nyédíi ne Krístəá, Krístəá ayagé nyé. Eesaá nēŋgáne moonyonŋ áyagéε mod. Krístəá mó ayagé nyé é edəádəŋ-tê. Ahúde áden abé dé mbéb.

12 Ade bēndusénné nyé, édé née nyēnwé, bélímé nyé, Dyōb ápūūd-te nyé ne Krístəá. Nén dēmbenléd

ne nyé áyāle nyêndúbé nén bán ngíne e Dyõb echê epuúdté Krístæa êpuúú nyémpê.

13 Ngen e'só nyêmbé byánán nyêwédé áyāle nyêbóó'áá mbéndé é Dyõb. Ene pónde-'ε né Krístæa éêhūdēē nyé abé dé mbéb áyāl. Bon bɔɔb, Dyõb ábágé nyé alongé dékōlē apuud áde ápuúdté syánē ne Krístæa. Alāgséné syánē nímēd mbéb ísyāāl.

14 Edé nêngáne apínné mbéb míme syánē wée ântenlé mó. Nédē nímê mbéb méesaá ámpê. Dyõb ábómmé nímê mbéb á awɔg abome áde bébómmé Krístæa á awɔg bon awé-'ε.

15 Dyõb déntōm ngíne ne benkamlené bé nkõnsé áte. Atóm áde ántōmmē bó, dényínnēd ne moosyāal ne awé áde Krístæa ánwēē á awɔg.

16 Né-ɔó, nyéēmwāg-se bad bélāngē nyé bán nyêbelé awusé áyāle nyédyáγκē donge dé medyé, ké'ε áyāle nyémwáγκē donge dé mmítéd, ké'ε áyāle nyéebāγκē donge á ngande ásē, ké'ε ngande echê ebāg nzé ngɔn étúbé túbén, ké'ε ngande e Epun é Nkóme áte.

17 Echê mbéndé ésyāāl ébédé-'ε née e'díidíngē ábē é'lúmté'áá mam mé bwám míme Dyõb déntāngēnnē alóm. Krístæa mó-'áá alónté nímê mam mésyāāl.

18 Nyéēmwāg-se mod anyágéd nyé áá nyétāngéné yāl asuded. Nyéēmwāg-ke se mod anyágéd nyé nén áá nyétāngéné ángel edúbé abe ngáne ábageé. Nzé nyêbelé nê né nyéebōd nde echê Dyõb áhóbé áá mósɔbē nyé. Kénzée awē ayágte' nê, áhóbe' áá mónyīnē á ndóg-te. Ene ndín e mod edé kúmbe ngên ne mekan mé mbéb míme níbíde' mó á nlém-tê, bon eewóó'é nzɔm ké póg ábê.

19 Ene ndín e mod esógé Krístæ awě adé nló ní bad ábe bédúbpé adúbe. Ngáne nló ríkamlanné yǎl esyǎál, melemlem nê dǒo Krístæ ákamlanné bad ábe bédúbpé mǒ bésyǎál ábel bébê mod nhóg. Ngáne nsid ríladé mebónj mé yǎl mé mod bonj abé mod nhóg, nê dǒo Krístæ áladé bad ábe bédúbpé mǒ ábé mod nhóg ásē echê. Mmê nlatén ríkwoge-’ε ngáne Dyöb átífidé.

*Awé ne ábé á alongé ne Krístæ*

20 Edé bǒob byánán awé áde Krístæ áwédé, nyêwédé ne mǒ. Né-ǒó nyéesaá ásē e mbéndé é nkǒñsé ámpē. Chee-ǒ ékǎá bonj nyêbé nyéhídē’ échê mbéndé byánán nkǒñsé rídíi ríkamlan nyé?

21 Abê bemeléede bé metóm bélânge nyé nén bán, “Nyéechánge échén, nyéewóglán échíníí á nsəl, nyéēsítán échê.”

22 Echê mbéndé ésyǎál éñone’ bwēm ábē béēbāg dyamdyam ámpē nzé mod amaá bó abenled. Echê mbéndé édíí mbéndé ne ayáge áde bad bèn béhǎgné nló.

23 Echê mbéndé ébelé ényĩnnāād byánán édé debyéé áte bwāmbwam áyāle nén, éyágte bad nén bán bèn bétánjéné néε béwóó nlém ábel mekan míme mékámé abel, álúmed nén bán békoo Dyöb ahíd. Eyágte bad bán bésuded yǎl, bébane-’ε yǎl á metake-tê bwāmbwam. Bonj ké bad bénhūū échê mbéndé ahíd, éheléé bó awónjgen ásóg mewēmten mé mbéb awónj.

### 3

1 Edé bǒob byánán apuud áde Dyöb ápuúdté Krístæ, nyémpē nyêpuúde ne mǒ. Né-ǒó, nyébê



nyóngé áyāl e mam mé m̄n, wée Kr̄stəá ádíí á nkamlən á ekaá émbáá é Dyöb.

<sup>2</sup> Nyébê nyésum nlém áyāl e mam mé m̄n, nyéēsūmē nlém áyāl e mam mé nköŋsé.

<sup>3</sup> Nyébíí nén bán, awé áde Kr̄stəá áwédé, édé nêŋgáne nyémpē nyêwédé.

<sup>4</sup> Kr̄stəá mó ádé alongé ádēd, áde áπεέ-’ε á nköŋsé-te wén nyémpē nyéēbē ne mó ne ehúmé ésyāāl.

*Alongé dé nchun ne alongé dékōālē*

<sup>5</sup> Né-ōó, nyéhúd mekan mé ekob é yāl nlém ne ahúd ásyāāl. Nyéhúd nlém áyāl e mam nêŋgáne, akáb dé mesón, mbinde é mekan, esíí é mam mé ekob é yāl, áwón mewēmtən mé mbéb ne ngoód. Nzé nyédé ngoód né édé nêŋgáne nyébage Dyöb démpēe edúbé.

<sup>6</sup> Dyöb dékōgsēn bad bésyāāl ábē bébele’ échén ndín e mekan. Echén ndín é mekan éliŋse’ Dyöb, né-ōó, ákōgsēn bad ábe bébele chó hēén.

<sup>7</sup> Echén ndín é mekan chóó nyébéláá ngen e e’só, áde esíí é mekan mé nköŋsé ékámlánáá nyé.

<sup>8</sup> Bōŋ bōb mekan nêŋgáne meliŋgá, pél, ekoyí, ábébed mod d̄n, ne ábéb nsəl áte, nyétāŋgéné mó asóg dé abel.

<sup>9</sup> Nyéekanlé’ nhóg ne aníníí metóm. Nyéēbēlē’ m̄mēn mekan ngáne édíí bán nyémaá áden abé dé mbeltéd mé mbéb atede.

<sup>10</sup> Bōb-pōó nyémaá nkob mékōālē ahé. Dyöb áhédé nyé ádén alongé dékōālē áte, akwoŋte-’ε dó ábel nyébê née mó, nyékoŋ-’ε mó awē ahégé nyé abíí bwām. Awón áde nyéwóó ádén alongé dékōālē ábélé

11 nhəŋlén méesaá átintê e mod awě adé mod a Israel ne awě eésě, ké'ε mod awě béyagé ne awě béeyagéε. Ken mod adé mod a nken-ε, ken mod e ahín-tê-yε, ken ntāŋ-ε, ken kunze-yε. Krīstəə mó adé dyam ásyāāl adé-ε bó mod asyāāl áte.

12 Né-ɔ́, nyétəŋgéné nlém ní ngəl awón, nyétəŋgéné nlém abon, nyétəŋgéné-ε yəl asuded. Nyétəŋgéné apwiited, nyétəŋgéné-ε awεsen.

13 Nyétəŋgéné nhóg ne aníní awεsen. Nzé mod bó waáb békúú waáb álagsén mó. Ngáne Səŋgwéé álagséné nyé, nyémpē nyétəŋgéné nyélagsén nhóg ne aníní.

14 Amīn e nímén mésyāāl, nyédəŋ nhóg ne aníní. Edəŋge chɔ́o élade' chəm ésyāāl.

15 Krīstəə abelé nyédé nsəŋ ne nhóg ne aníní. Né-ɔ́ nímê nsəŋ nítəŋgéné chəm ésyāāl échě nyébeleé alyáged. Nyétəŋgéné nyésəgnən-ne Dyəb pónde ésyāāl.

16 Eyale éche Krīstəə ébê nyé á nlém-tê bwám abé ne abé. Nyébenlad échê eyale ne debyéé ásyāāl áyáged ne áléb nhóg ne aníní. Nyékəŋne' Dyəb ngəse éche édé á kálag e Dyəb. Nyékəŋne' Dyəb ngəse éche ékəmte' Dyəb ne Krīstəə, ne nkəŋgé ké ríhéé níme nípiídé nyé ákemed Dyəb. Nyékəŋne' mó ásaŋnən mó ne nlém nisyāāl.

17 Kéchéé échě nyéhəbεé, ké'ε échě nyébeleé, nyébele chɔ́ á dīn áde Səŋgú Yesue. Nyésəgnan Dyəb Titée á dīn á Yesu.

### *Aloŋgé dékəālē ade nyétəŋgéné awón*

18 Nyé bebaád bé bechóm, nyéwógne áben bechóm. Nê dɔ́o bad ábě bédúbpé Səŋgwéé bétəŋgéné abel.

19 Nyé baachóm ábe nyêwóó bebaád, nyédəŋ ábən bebaád, nyéətagté-’ε bó ngên.

20 Nyé bãnbăn, nyéwógne áben bésáá ne benyaá áyāl e kéchéé échě nyébeléé. Nê dǎo Sǎŋgwéé ádáá aá nyébel.

21 Nyé bésáá bé bãn, nyéekaŋté áben bãn. Nzé nyékaŋte’ bó, né nyésũnte bó yǎl áte.

22 Nyé betāŋ, nyéwógne áben bewón pǎndé ésyāāl. Nyéəbenlé bó nsón dásō pǎndé echě bényínéé nyé ábel békémed nyé. Bōŋ nyébenle bó ne nlém nhóg áyāle nén Sǎŋgwéé mǎo nyébagéé edúbé.

23 Nsón ké ríhée nímě nyébeléé, nyébele’ mó ne nlém nsyāāl. Nyébele mó, nyébíi-’ε nén bán Dyöb dǎo nyébenléé saké baányon.

24 Nyébíi nén bán nyéēküd nsábe níme Sǎŋgwéé ákǎŋnéde ábē bad. Krīstəə mó adé mod awě nyékoo’é abele.

25 Dyöb dékǎgsēn kénzée awě abelé mbéb áyāl e mbéb níme ábélé. Dyöb déekwognádté modmod.

## 4

1 Nyé bad ábe nyêwóó betāŋ ásē echēn nyéwále áben betāŋ nyaa echě Dyöb áhedeé, nyécháə-’ε bó bwām. Nyébíi nén bán nyémpē nyêwóó mod ámīn awě nyédíi ásē eché.

### *Paale awéde’ bad nlém á abum*

2 Nyébê nyéwéd yǎl áte á mekáne-tê. Nzé nyékānne-’ε nyébānē nlém ne kéchéé éche nyélāŋgéé Dyöb, nyésāgnēn-ne mó.

3 Nyékānne-tē sémpē ábel nén Dyöb ánedned sé nzii ákal nkalaŋ tǎŋgene Krīstəə níme bad

békənsónɔtənné bɔ́d. Mmê nkalaŋ níme níkaléé mɔ́ níkáá boŋ mbé á mbwəg.

<sup>4</sup> Nyékáñne' nén bán níkalé mó bwám nyaa eché níɔŋgéné abel.

<sup>5</sup> Nyébíi ngáne nyébeleé mekan nzé nyêdé ne bad ábe béédúbpe Krístəə. Póndé téé eche etál ébágné ne nyé, nyébeñle' bó mekan me bwám.

<sup>6</sup> Nzé nyáábɔ́ nyékale', nyéched ehób á nsəl, nyékale póle éche éboŋte bad nlém á abum. Nzé nyébele' nê, né nyéébíi ngáne nyékwəntanné kénzéé awě asədté nyé dyam.

### *Melentən mé asóg*

<sup>7</sup> Tikikusə, mwǎnned a nlém a Krísto əlāā nyé mam níme mébeñlad ne me hén. Mómpē adii mbələde awě abeñle Səŋgwéé ne nlém nhóg nchoo ne me.

<sup>8</sup> Nlóme' mó əwəñ əbeñ boŋ əláa nyé ngáne sédí, əwəd-te nyé nlém á abum.

<sup>9</sup> Nlóme' bó Onesimus. Onesimuse mómpē adii mwǎnned a Krísto awesyánē awě dédáá. Mómpē abeñle Krístəə ne nlém nhóg. Adii mod awě abídé əwəñ dyad. Bó Tikikusə bəlāā nyé mam níme mébeñlad hén.

<sup>10</sup> Aristakusə awě súmɔ́ bedé á mbwəg hén alənté nyé. Banabasə mwǎnyaŋ mómpē alənté nyé. Meməd nyé aláa təŋgene Makəse. Nzé apedé, nyékob mó nken.

<sup>11</sup> Yesue awě béchəgəé bán Justusə, mómpē alente' nyé. Abén bad bəlāán bəñpeñ bóó bédé bad bé Israel ábe bédúbpe Krístəə, ábe syáábɔ́ debele' nsón əkal nkalaŋ təŋgene nkamlən ní Dyəb. Békəwəd me nlém abum bwəmbwam.

<sup>12</sup> Epafraσε mómpē alěnté nyé. Mómpē adii mod awě abídé áwēn dyad, abé-'ε mbəledε awe Yesu Krīstəə. Akānnad nyé pón dé téé. Aá Dyöb dēn ábel nyékoη chōm éche áhεdεé aá nyébel abii, nyébel-le chó.

<sup>13</sup> Mmēn mbíde' mó mbónη nén mεé abelé nsón bwāmbwam áyāle echēn ne áyāl e bad bé Krīsto ábe bédé á Laudesia ne á Hirapōlis.

<sup>14</sup> Lukase, dógtεε awě dédáá bó Demase, bómpē bélómmé nyé melentεn.

<sup>15</sup> Nyélentεd mε bānned bé Krīsto ábe bédé á Laudesia. Nyélentεd-tε mε Nimfaa, ne bad ábe bédúbpé bésyāāl ábe bébome' áwe ndáb.

<sup>16</sup> Nzé nyēmaá enén kálag alāη, nyélóm chó á Laudesia ábel bómpē belāη chó. Nyémpē nyényín nén bán nyéláá kálag echē rílómmé bad bé Laudesia.

<sup>17</sup> Nyéláa Achipuse bán ányín nén aá mómadé nsón míme Sāηgwéé ábágé mó aá ábel.

<sup>18</sup> Mε Paale mmēn-εé mbēnlédé échēm ekáá átele nyé mímén melentεn. Nyéēchatán nén bán ndé á mbwəg. Nsimé ní Dyöb ríbê ne nyé.

**Mel̃ Mékōōlē**  
**New Testament in Akoose (CM:bss:Akoose)**

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Akoose

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48